

劍南詩鈔

劍南詩鈔

宋陸游務觀著

昆陵楊大鶴芝田選
侯官許貞幹豫生校

七言古

喜小兒輩到行在

阿綱學書蚓滿幅阿繪學語鶯囀木截竹作馬走不休小車駕羊聲陸續
畫窗浣壁誰忍嗔嗔呼也復可憐人却思湖馬飲江水敢道春風無戰塵
傳聞賊棄兩京走列城爭為朝廷守從今父子見太平花前飲水勿飲酒
閏二月二十日遊西湖

西湖二月遊人稠鮮車快馬巷無留梨園樂工教坊優絲竹悲激雜清謳
迫逐下上莫始休外雖狂醒樂則不豈知吾曹淡相求酒肴取具非預謀
青梅苦筍助獻酬意象簡樸足鎮浮尚慚一官自拘囚未免足馬從兩騶
南山老翁亦出遊百錢自挂竹杖頭

无咎兄郡齋燕集有詩末章見及敬次元韻

城樓畫角吹晚晴梅花墮地草欲生綺盤翠杓春滿眼我胡不樂君將行

君歸吾黨共增氣往往怪我衰涕橫我來江干舊交少見君不啻河之清
北風共愛地爐暖西日同賞油窗明微吟劇醉不知倦坐閱漢臘逾周正
君文雄麗擅一世凜凜武庫藏五兵酸寒如我每自笑顧辱刻畫為虛聲
乃知好士如好色遇合不必皆傾城君方與世作水鏡如此過許人將驚
千金敝帚有定價周玉鄭鼠難強名失言議罰不可緩敬白府主浮金觥
君看失脚踏落塵土豈復髭髮餘詩情自傷但似路旁堠雨剝風摧供送迎

醉中歌

吾少貧賤真臞儒貪食嗜味老不除折腰斂版日走趨歸來聊以醉自娛
長鉶巨榼羅杯盃不須漁翁勸三閭牛尾膏美如凝酥猫頭輪囷欲專車
黃雀萬里行頭顱白鵝作鮮天下無潯陽糖蟹徑尺餘吾州之煒尤嘉蔬
珍盤鉅釘百味俱不但項鬻與腹腴悠然一飽自笑愚顧為口腹勞形軀
投効行矣歸園廬莫厭糲飯嘗黃蘗

上巳臨川道中

二月六夜春水生陸子初有臨川行溪深橋斷不得渡城近卧聞吹角聲

三月三日天氣新臨川道中愁殺人纖纖女手桑葉綠漠漠客舍桐花春
平生怕路如怕虎幽居不省遊城府鶴軀苦瘦坐長飢龜息無聲惟默數
如今自憐還自笑歛版低心事年少儒冠未恨終自誤刀筆最驚非素料
五更欹枕一悽然夢裏扁舟水接天紅蕖綠芰梅山下白塔朱樓禹廟邊
雨霽出遊書事

十日苦雨一日晴拂拭拄杖西村行清溝泠泠流水細好風習習吹衣輕
四鄰蛙聲已閣閣兩岸柳色爭青青辛夷先開半委地海棠獨立方傾城
春工遇物初不擇亦秀蕪麥開蕪菁薺花如雪又爛熳百草紅紫那知名
小魚誰取置道側細柳穿顰危將烹欣然買放寄吾意草菜無地蘇疲氓
題十八學士圖

隋日昏瞠東南傾雷塘風吹草木腥平時但忌黑色兒不知乃有虬鬚生
晉陽龍飛雲滄滄關洛萬里即日平東征歸來脫金甲天策開府延豪英
琴書閒暇永清晝簪履光彩明華星高參伊呂列佐命下者才氣猶崢嶸
但餘一恨到千載高陽繆公來竄名老奸得志國幾喪李氏誅徙連孤嬰

向令亟念履霜戒危亂安得存勾萌衆賢一佞禍尚爾掩卷涕淚臨風橫
寄黃龍升老

讀書萬卷裂儒衣黃金可成棄不為快哉天馬不可羈開口便呼臨濟兒
諸方蹴踖莫支持吾州一老偶得之升祠佛智裕公閉門夜付僧伽黎明日聲價
羽檄馳弟子不必不如師黃龍所立尤瑰奇空山高火號狐狸築屋千礎
食萬緡癡人不解公遊嬉嫉怒欲碎門前碑世衰道喪士自欺山林亦復
踐駭機長謠寄公公試思我輩救此當何施

夜聞松聲有感

清晨放船落星石大風吹颿如箭激回頭已失廬山雲却上吳城觀落日
夜深龍歸擘祠門入木數寸留爪痕明朝就視心尚慄腥風卷地雷霆奔
歸船買酒持自慰性命平生驚屢戲固知神怒有定時波紋感作魚鱗細
如今衰病卧林垞霜覆茆簷月滿庭松聲驚破三更夢猶作當時風浪聽
丙戌七月自京口移官豫章冒風濤自皇子解舟半日至吳城山小龍廟

石首縣雨中繫舟戲作短歌

庚寅去吳西適楚秋晚孤舟泊江渚荒林月黑虎欲行古道人稀鬼相語
鬼語亦如人語悲楚國繁華非昔時章華臺前小家住茆屋雨漏秋風吹
悲哉秦人真虎狼欺侮六國囚侯王亦知興廢古來有但恨不見秦先王
開窗酌汝一杯酒等為亡國秦更醜驪山冢破已千年至今過者無傷溝

醉歌

老夫檣竿插蒼石水落岸沙痕數尺江南秋盡木搖落樹葉離離楓葉赤
楚人自古多悲傷道旁行歌猶感激野花碧紫亦滿把澗果青紅正堪摘
客中得酒薄亦好江頭爛醉真不惜千古興亡在目前鬱鬱關河含暝色
飢鴻垂翅掠舟過此意與我同悽惻三撫闌干恨未平月明正照顏烏幘

滄灘

百夫正譴助鳴臆舟中對面不得語須臾人散寂無譁惟聞百丈轉兩車
嘔嘔啞啞車轉急舟人已在沙際立霧斂蘆村落照紅雨餘漁舍炊煙濕
故鄉回首已千山上峽初驚第一灘少年亦慕宦游樂投老方知行路難
風雨中望峽口諸山奇甚戲作短歌

白鹽赤甲天下雄拔地突兀摩蒼穹凜然猛士撫長劍空有豪健無雍容
不令氣象少滯滯常恨天地無全功今朝忽悟始歎息妙處原在煙雨中
太陰殺氣橫慘淡元化變態含空濛正如奇材遇事見平日乃與常人同
安得朱樓高百尺看此疾雨吹橫風

岳池農家

春深農家耕未足原頭叱叱雨黃犢泥融無塊水初渾雨細有痕秧欲綠
綠秧分時風日美時平未有差科起買花西舍喜成婚持酒東鄰賀生子
誰言農家不入時小姑畫得城中眉一雙素手無人識空村相喚看繅絲
農家農家樂復樂不比市朝爭奪惡宦遊所得真幾何我已三年廢東作

山南行

我行山南已三日如繩大路東西出平川沃野望不盡麥隴青青桑鬱鬱
地近函秦氣俗豪鞦韆蹴鞠分朋曹首着連雲馬蹄健楊柳夾道車聲高
古來歷歷興亡處舉目山川尚如故將軍壇上冷雲低丞相祠前春日暮
國家四紀失中原師出江淮未易吞會看金鼓從天下却由關中作本根

木瓜鋪短歌

鼓樓坡前木瓜鋪歲晚悲辛利州路當車礪礪石如屋百里夷途無十步
溪橋缺斷水齧沙崖腹崩頽風拔樹虎狼安尾擇肉食狐狸豎毛啼日暮
冢丘短草聲窸窣往往精靈與人遇我生胡為忽在此正坐一飢忘百慮
五更出門寒裂面半夜燎衣泥滿袴妻孥八月離夔州寄書未到今何處
餘年有幾百憂集日夜朱顏不如故即今臺省盛諸賢細思寧是儒冠誤
綿州錄參軍廳觀姜楚公畫鷹少陵為作詩者

我來訪古涪之濱不辭百回翼一真走馬朝尋海樓館斫膾夜醉魴魚津
越王高樓亦已換俯仰今古堪悲辛督郵官舍最卑陋棟撓楹腐知幾春
歸然此壁獨亡恙老槎勁翮完如新向來劫火何自免叱呵守護疑有神
狐狸九尾穴中國共置不問如越秦他時此物合致用下韝指呼端在人
會當原野灑毛血坐令萬里清煙塵老眼還憂不及見詩成肝胆空輪囷
三月十七日夜醉中作

前年膾鯨東海上白浪如山寄豪壯去年射虎南山秋夜歸急雪滿貂裘

今年摧頽最堪笑華髮蒼顏羞自照誰知得酒尚能狂脫帽向人時大叫
逆胡未滅心未平孤劍床頭鏗有聲破驛夢回燈欲死打窗風雨正三更
護國天王院故神霄玉清萬壽宮也廢圯畧盡而規模尚極壯麗過
之有感

太霄帝君神霄府一日璽書行海寓築宮奔走誰敢後萬牛挽材山作礎
步虛夜半落雲間玉磬濛濛鸞鶴舞帝師丞相領使君侍晨校籍紛如雨
洛陽臨淮小脾晚御史立奏投裔土從來桑門喜嘲競舉國冠巾噤無語
古傳東海會揚塵君看此地亦荆榛霓旌仙仗空遺堵甃缺臺傾知幾春
牧兒驅牛鬻庭草誰記劍佩來朝真斜陽却上筍輿去溝水泠泠愁殺人
玻瓈江

眉州笑飲亭蓋取東坡笑飲玻瓈江之句追懷舊遊戲作以補西州樂府

玻瓈江水千尺深不如江上離人心君行未過青衣縣妾心先到峨眉陰
金樽笑醕不知曉月落煙渚天橫參車輪無角那得住馬蹄不方何處尋
空憑尺素寄幽恨縱有綠綺誰知音愁來只欲掩屏睡無奈夢斷聞疎砧

古樂府安得雙車輪一夜生四角唐人詩云長安塵土中馬蹄圓重重郎馬蹄不方何處認郎蹤

木山

枯楠千歲遭風雷披枝折幹吁可哀輪囷無用天所赦秋水初落浮江來
嵌空宛轉若耳鼻峭瘦拔起何崔嵬珠宮貝闕留不得忽出洲渚知誰推
書窗正對雲洞啟叢菊初傍幽篁栽是間著汝頗宜稱摩挲朝暮真千回
天公解事雨十日洗淨泥滓滋莓苔一邱一壑吾所許不須更慕明堂材
聞王嘉叟訃報有作

嗚呼嘉叟今信死哭君寢門淚如水我初入都不妄交傾倒如君數人耳
籠燈踞雪夜相過劇論懸河駭鄰里地爐燔栗美芻豢石鼎烹茶當醪醴
上書去國何勇決作詩送君猶壯偉十年偶復過都門君方草制西垣裏
鬢鬚斑白面骨生心頗疑君遽如此西來例不候達官每欲寄聲中輒止
隻雞絮酒縱有時雙鯉素書長已矣生前客屨紛滿戶身後人情薄于紙
懸知海內莆陽公

謂林丞相

獨念遺孤為經紀

十月十九日與客飲忽記去年此時自錦屏歸山南道中小獵今又
將去此矣

去年縱獵韓壇側玉鞭自探南山雪今年痛飲蜀江邊金杯却吸峨眉月
竹枝歌舞新教成淒怨傳得三巴聲城頭築觀出雲雨峨眉正與闌干平
酒酣詩就擲杯去醉蹋玻璃江上路懸知幽澗斷橋邊已有梅花開半樹
得韓元咎書寄使金時宴東都驛中所作小闌

大梁二月杏花開錦衣公子乘傳來桐陰滿地掃不得金轡玲瓏上源驛
上源驛中槌畫鼓漢使作客胡作主舞女不記宣和粧廬兒盡得女真語
書來寄我宴時詩歸鬢知添幾縷絲有志不須深感慨築城會據拂雲祠

唐中受降城
在拂雲祠

斷碑數

興元姚節度園以折碑為石蜀文猶可識蓋梁
蕭懿墓碑簡文為太子時撰書法遒美可愛

二蕭同起南蘭陵欲如文叔與伯升至今人悲大蕭死瘡恨不見梁家興
崇崇之陵久為谷豈惟羣盜分珠玉斷碑槎牙棄道邊文字班班猶可讀
剝剝苔蘚一悽然俯仰人間幾變遷世人作碑君勿哂千載園林須石筍
十二月十一日視築隄

注水來自蠻夷中五月六月聲摩空巨魚窮龜牙鬚雄欲取闌市為龍宮

橫隄百丈卧霽虹始誰築此東平公今日樂哉適歲豐更不相倚勇赴功
西山大竹織萬籠船舸載石來亾窮橫陳屹立相臺重置力尤在水廟東
我登高原相其衝一盾可受百箭攻蜿蜒其長高隆隆截如長城限羗戎
安得椽筆記始終插江石崖堅可礮

病酒新愈獨卧蘋風閣戲書

用酒驅愁如伐國敵雖摧敗吾亦病狂呼起舞先自困閉戶垂帷真廟勝
今朝屏事卧湖邊不但心空兼耳靜自燒沉水瀾紫筍聊遣森嚴配堅正
紫筍蒙頂之上
者其味尤重追思昨日乃可笑倚醉題詩恣豪橫逝從屈子學獨醒免
使曹公怪中聖

神君歌

謂英顯廟作

泰山可為礪東海可揚塵惟有壯士志死生要一伸我夢神君自天下威
儀奕奕難具陳飛龍駕車不用馬訶前殿後皆鬼神奇形詭狀密如魚鱗
舳舳鱗鱗爭扶車輪黑纛白旌其來無垠黃霧紫氛合散輪囷考錄魑魅
號呼吟呻約束蛟螭天矯服馴後車百兩載美人中構鮮麗工笑顰金尊

金言詩金
翠杓溢芳醇琵琶瑩襍飾怪珍世間局促常悲辛神君歡樂千萬春嗚呼
生不封侯死廟食丈夫豈得飽志長默默

同何元立賞荷花追懷鏡湖舊遊

少壯飲酒氣吐虹一笑未了千觴空涼堂下簾人似玉月色泠泠透湘竹
三更畫船穿藕花花為四壁船為家不須更踏花底藕但嗅花香已無酒
花深不見畫船行天風空吹白紵聲雙槳歸來弄湖水往往湖邊人已起
即今憔悴不堪論賴有何郎共此尊紅綠疎疎君勿歎漢嘉去歲無荷看

怡齋

東湖仲夏草樹荒屋古無人亭午涼萱房微呀不見日筍簾自解時吹香
野藤蟠屈入窗罅濕菌扶疎生屋梁跨溝數椽最幽翳漲水及檻雨敗牆
靜涵青蘋舞藻荇閒立白鷺浮鴛鴦芙蓉雖瘦亦瀾漫照眼翠蓋遮紅粧
水紋珍簾欲卷却團團素扇嬾復將天風忽送塔鈴語喚覺清夢遊瀟湘

龍湫歌

環漱巨木老不花翕淪千尺龍所家爪痕入木欲數寸觀者心掉不敢譁

去年大旱綿千里禾不立苗麥垂死林神社鬼無奈何老龍欠伸徐一起
隆隆之雷浩浩風倒卷江水傾虛空鱗間出火作飛電金蛇夜掣層雲中
明朝父老來賽雨大巫吹簫小巫舞祠門人散月娟娟龍歸抱珠湫底眠
月夕

我昔隱天台夜半遊句曲弄月過垂虹萬頃一片玉煙艇起菱唱水風吹
釣絲更欲小徙倚恐失初平期今年遊青城三十六峰巒白雲反在下使
我毛骨寒天如玻璃鍾倒覆濕銀海素壁行其間章木盡光彩嫦娥顧我
笑手撫玉兔免莫怪世人生白髮秋風桂老欲無枝

蒸暑思梁州述懷

宣和之末予始生遭亂不及遊司并從軍梁州亦少慰土脉深厚泉流清
季秋嶺谷浩積雪二月草木初抽萌夏中高涼最可喜不省舉手驅蟲蟲
藏水一出賣滿市玉璞堆積寒崢嶸柳陰夜卧千駟馬沙上露宿連營兵
胡笳吹墮漾水月烽燧傳到山南城最思出甲戌秦隴戈戟徹夜相摩聲
兩年劍南走塵土肺熱煩促無時平荒池昏夜蛙閭閻食菜白日蠅營營

何時王師自天下雷雨瀕洞收機槍老生衰病畏暑濕思卜鄴杜開紫荆

觀小孤山圖

江平風不生鏡面渺千里軻峨萬斛舟遠望一點耳大孤江中央四面峭
插水小孤特奇麗丹翠凌雲起重樓邃殿神之家帳中美人縈如花遊人
徙倚闌干處俊鶻橫江東北去

飲酒

陸生學道欠力量胸次未能和盎盎百年自笑足悲歡萬事聊須付酣暢
有時堆阜起崢嶸大呼索酒澆使平世間豈無道師與禪老不如閉門參
麴生朋舊年來散如水惟有鐺杓同生死一日不見令人愁晝夜共處終
無尤世言有毒在麴蘖腐脇穿腸凝血脉人生適意即為之醉死愁生君
自擇

神山歌

吾聞海中五神山其根戴以十五鼇一朝六鼇被釣去岱輿員嶠沉洪濤
尚餘三山巋然在當時不沒爭秋毫如何蓬萊又已淺忽見平地生藜蒿

伏義迄今幾萬歲世事如火煎油膏娶妻不敢待翁命治水無暇憐兒號
避讒奔走僅得免歷聘返魯終不遭老聃關尹亦已死人寔危脆無堅牢
有口惟可飲醇醪有手惟可持霜螯勿令他人復笑汝後有萬世來滔滔

度祚

江原縣

翩翩翩翩祚受風行人疾走緣虛空回觀目眩浪花上小跌身裹蛟涎中
汗沾兩握色如菜數乘此險私自怪九折原非叱馭行千金空犯垂堂戒
此身老大足悲傷歲歲天涯憶故鄉安得畫船明月夜滿川歌吹入盤閭

盤閭姑蘇二門名

六月二十五日曉出郊

劍南作客歲再淹正如病翼遭稿黏短衣射虎性所樂不耐齷齪垂車幃
今晨偶出得一快欣然意若脫楚鉗曉星已疎更磊磊殘月欲盡猶纖纖
雞鳴已與夜漏斷鴉起似逐朝陽暹揚鞭走馬忘老慙自笑狂疾何由砭

龍眠畫馬

國家一從失西陲年年買馬西南夷瘴鄉所產非權奇邊頭歲入幾番

一作

數
皮崔嵬瘦骨帶火印離立欲不禁風吹圉人太僕空列位龍媒汗血來
何時李公太平官京師立仗慣見渥洼姿斷縑歲久墨色暗逸氣尚若不
可羈賞奇好古自一癖感事憂國空餘悲嗚呼安得毛骨若此三千足銜
枚夜度桑乾磧

長歌行

人生不作安期生醉入東海騎長鯨猶當出作李西平手鳥逆賊清舊京
金印煌煌未入手白髮種種來無情成都古寺卧秋晚落日偏傍僧窗明
豈其馬上破賊手哦詩長作寒螿鳴興來買盡市橋酒大車磊落堆長鉶
哀絲豪竹助劇飲如鉅野受黃河傾平時一滴不入口意氣頓使千人驚
國讎未報壯士老匣中寶劍夜有聲何當凱還宴將士三更雪壓飛狐城
離堆伏龍祠觀孫太古畫英惠王像

岷山導江書禹貢江流蹴山山為動嗚乎秦守信豪傑千年遺跡人猶誦
決江一支溉數州至今禾黍連雲種孫翁下筆開生面岌業高冠摩屋棟
徒木遺風雖峭刻取材尚足當世用寥寥後世豈乏人尺寸未施譏已衆